

24. marts 2022

UPA2022/8

2021-imut ilassutissatut aningaasaliissutitut inatsisissatut siunnersuut

(Aningaasaqarnermut Aatsitassanut Inatsisit Atuutsinnerannut Naligiisitaanermullu Naalakkersuisoq)

Aningaasaqarnermut Aatsitassanut Inatsisit Atuutsinnerannut Naligiisitaanermullu Naalakkersuisup saqqummiussaanut qutsavigaarput.

2021-imut Aningaasanut Inatsimmi ilassutissatut aningaasaliissutitut pillugit Siumumiit oqaaseriumasagut saqqummiutissavakka.

2021-imut ilassutissatut aningaasaliissutitut Inatsisartunut siunnersuutip imarivai 2021-imut aningaasanut inatsimmi aningaasaliissutissatut oqaasertallu Inatsisartunit akuersissutigineqarsimasut aallaavigalugit, Naalakkersuisut Aningaasaqarnermut Akileraaratarnermullu ataatsimiisitaliamut allannguutissatut imaluunniit ilassutissatut qinnutigisimasaat, ataatsimiisitaliamit akuersissutaasimasut.

Aningaasanut Inatsimmi 2021-imoortumut Inatsisartut akuersissutigisaat kiisalu maanna 2021-imut ilassutissatut aningaasaliissutitut nunatta karsiata naatsorsuutaanik 2021-imoortunik naammassinniarnermut aallaaviussapput.

Ukioq 2021-imi aningaasanut inatsimmi Ingerlatsinermut Sanaartornermullu (naalisarlugu: IS) kingorna aningaasaasat inernerat 76,2 mio.-inik amingartooruteqarfissatut missingersuusiorfiusimagaluarpoq kisiannili Ingerlatsinermut Sanaartornermullu Taarsigassarsisitsinermullu (naalisarlugu: IST) kingorna aningaasaasat inernerat 66 mio.-inik amingartooruteqarfissatut missingersuusiorfiusimagaluarluni.

Aningaasanullu Inatsimmi akuersissutaasimasut aammalu ilassutissatut aningaasaliissutitut akuersissutaasimasut kingunerisaannik maanna Ingerlatsinermut Sanaartornermullu Taarsigassarsisitsinermullu angusaq 149,1 mio.-inik ajorseriaateqarpoq. Tamatumani Covid-19-ip kingunerisaanik inuussutissarsiortunut suliffeqarfinnut aammalu saarullinniarlutik aalisartunut ikiorsiissutitut kiisalu Kalaallit Airport Holding A/S-imut immikkut aningaasaliissuteqarfignissimanerit annerpaamik pisuupput. Taamaasilluni ukioq 2021-imut Ingerlatsinermut Sanaartornermullu angusaq katillugu 225,2 mio. amingartooruteqarfiulluni.

Siorna aningaasanut inatsimmi immikkut aningaasaliinissat eqqartorneqarnerani Siumumiit ersarissumik Naalakkersuisunngortunut ilaatigut piumasaraarput, sinerissap qanittuani saarullinniarlutik aalisartut KNAPK qanimut suleqatigalugu immikkut aaqqiivigisariaqaraat. Taamaattumik Siumumiit tamatumani ikiorsiisoqarsimanera iluarisimaarparput, naak ikiorsiineq suli tamakkiinerusinnaasutut isumaqarfiginaraluartoq. Siumumiillu Naalakkersuisunut kaammattuutigissavarput kattuffiit qanimut suleqatigilluarneqarnissasut. Tassami piffissami matumani sineriatsinni issittorsuuvoq aammalu sikoqarnera peqqutigalugu umiatsiaarasortut aammalu angallatersortut arlallit inuussutissarsiorsinnaanerit aningaasarsiorsinnaanerallu



imaannaanngitsorujussuarmut killiffeqarmat, taamaattumillu arlaatigut ikiorserneqarsinnaanissaat eqqumaffigisariaqarluni.

Piffissarlu manna iluatsillu Siumumiik Naalackersuisut ersarissumik kaammattuutigit apuukkusuppagut, ukuusut:

- Aningaasarsiorfissat mattussuunneqarnerisa kingunerisaannik inuussutissarsiutinik nutaanik aallartisaasoqartariaqavippoq, soorlu nunatta kujataani aammalu tunumi. Aammalu pisuussutigit uumaatsut umassusillillu atorluarneqartariaqarput minnerunngitsumillu nunatsinni nalittorsaaneq annertusarlugit – nunatta avataani iluanaarutit inissisimajunnaartillugit. Piaarnerpaamik tamakkua suleqatigiilluta ineriartortinngikkutsigit nunarput aningaasatigit ajalusoorujussuarnissaa Siumumiit ernumassutigigatsigu.
- Inuiaqatigiinni aaqqissuusseqqinnerit ingerlanneqartariaqarput, soorlu aamma tamanna aningaasaqarnermut siunnersuisooqatigiit ersarissumik kaammattuutigaa.
- Naalackersuisunut sakkortuumik kaammattuutigerusupparput inuiaqatigiit aningaasaataasa sukannersumik pitsaasumillu ukiuni kingullerni aqunneqarsimanerat sapanginnagu ingerlatsinissaq ingerlartissagaat, siunissamimi unammilligassagut anneroorujussuit inuiaqatigiinni aningaasatigit kalluaasussat aatsaat aqutsilluarnikkut partiillu akimorlugit suleqatigiinnikkut anigorsinnaagatsigit.

Siumumiit Aningaasaqarnikkut Ingerlatsineq pillugu nalunaarut 2022 oqaluuserisassat malillugit maajip 19-iani oqallinnissami assut qilanaarpugut. Tassami takusinnaalereeratsigu maanna Naalackersuisooqatigiit ukiup ataatsip iluinnaani inuiaqatigiit aningaasarsiornerata ammut aallartinneqarnera ersarissipallareersoq, mumisinnissaanut siumullu aallarteqqinnissaanut kivitseqataarusukkatta sunniuteqaqataarusukkattalu.

Taamatut oqaaseqarluta suliassaq Aningaasaqarnermut akileraartarnermullu ataatsimiititaliamut suliassanngorlugu ingerlatipparput.

Qujanaq

Erik Jensen, Siumut